



Inatsisartuni ilaasortaq Jens Napätök'  
/MAANI

**§ 37 naapertorlugu qilalukkap qernertap tuugaavinut apeqquteqaammut nr. 151,  
2023 tunngasumut akissut**

Inatsisartut suleriaasianni § 37-mi imm. 1 malillugu Naalakkersuisunut apeqquteqaateqarputit. Apeqqut uanga suliaasaqarfigisannit akineqartussanngorlugu innersuunneqarpoq.

**Naalakkersuisunut apeqqutit:**

- 1. Ilumoorpa Ilulissani sanaluttartut qilalukkat tuugaavinik nammineq akilerlugit pisiainnik arsaarinniffigineqarsimasut piniarnermi nakkutilliisumit?**

**Akissut:**

Naamik ilumuunngilaq.

Facebook-ikkut takuneqarsinnaariarmat sanaluttartuq qilalukkat tuugaavinik tuniniaasoq, piniarnermut nakkutilliisut nakkutilliinerminnut atatillugu sanaluttarfimmuut alakkaapput.

Piniarnermut nakkutilliisut sanaluttarfimmuut ornigupput, tuniniaasorlu naapillugu. Pineqartoq qilalukkap qernertap tuugaavinik sisamanik tuniniaavoq. Pineqartoq ilisimatinneqarpoq saaffigininnermut suna patsisaanersoq.

Namminersorlutik Oqartussat nalunaarutaat nr. 3, 27. januaari 2017-meersoq § 23, imm. 5, ima oqaasertaqarpoq:

*"Imm. 5. Taamaallaat inuussutissarsiutigalugu piniarnermut allagartamik atuuttumik aamma akuersissummik naqissusikkamik peqartut, takuuk § 21, imm. 1, qilalukkat qernertap tuugaavinik imaluunniit qilalukkap qaqqortap kigutaanik tunisisinnaapput. Allagartaq akuersissutip normutalik tuugaamut ilivitsumut allunaasartalerlugu ikkunneqassaaq."*

Sanaluttartuq saaffigineqartoq inuussutissarsiutigalugu piniarnermut allagartamik atuuttumik imaluunniit akuersissummik naqissusikkamik peqanngilaq. Sanaluttartuq ilisimatinneqarpoq qilalukkap qernertap tuugaavinik sisamanik tuniniaasinnaangitsaq, nalunaarummi piumasaqaatigineqartut naammassisimangimmagit. Arsaarinnissuteqartoqanngilaq.

Inussiarnersumik inuulluaqqusillunga

Kim Kielsen

Aalisarnermut Piniarnermullu Naalakkersuisoq

14-11-2023  
Suliap normua 2023-26525  
Allakkat nr. 23604106

Postboks 269  
3900 Nuuk  
Oqarasuaat (+299) 34 50 00  
Fax: (+299) 34 63 55  
E-mail: apnn@nanoq.gl  
www.naalakkersuisut.gl